



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 7

**China den arrtsü ken o bentettsü atema rangloker inyaksü: Jaishankar**

**Israel-i central Gaza amakdang nisung 226 tepset**



VOL. XXI ISSUE NO. 240 (ADOK 240) DIMAPUR RASEMNÜ (WEDNESDAY) AAMI (JUNE) 12, 2024 ₹ 5.00

## NSF-i non-Naga candidates aser non-local den kibong akümertem ashishir

**Dimapur, June 11, 2024 (TYO):** Naga Students' Federation (NSF)-i Urban Local Body (ULB) elections nung Naga nung dang tokteptsü nenshia metetdaksüogo.

Non-Naga nungeri local municipal nung inyakra iba nung lendong tulu keta lir. Maneni, non-Naga nunger den kibong akümba Nagatsürtem medendaksütsüla ta NSF-isa ashi.

"Lisopurtem ketdangsübaren nung non-Naga nunger shima inyadaksüra asen sobaliba senmang wazüka ayuba nung

lendong ajurutsü. Non-Naga nunger shimra asen sobaliba inyaksangshi nung timtem ajurutsü aser senmang menentsüsü" ta NSF-i ashi.

"Municipal aser town council elections ya Nagaland state nung aliba lisopur Naga nunger atema dang asütsüla. Naga nunger ta asübaji adoption agi masü saka azü agi Naga nunger asütsüla. Maneni, NSF-i iba elections nung non-local den kibong akümba Naga tsürtem medendaksütsü nenshir" ta parnokisa metetdaksüogo.

## COAS atema Lt General Upendra Dwivedi shimogo



teinyakdak Vice Chief of the Army Staff Lt Gen Upendra Dwivedi, PVSM, AVSM shimogo" ta Defence Ministry spokesperson A Bharat Bhushan Babu-i ashi.

Lt Gen Dwivedi ya 30 buba Army Chief asütsü aser pai Vice Chief of Army Staff, Northern Army Commander, DG Infantry aser tanga command appointments aika inyakba sülen COAS inyaksü, ta paisa ashi.

Lt General Upendra Dwivedi ya Sainik School, Rewa nung azüng aser December 1984 nung 18th Battalion of Jammu and Kashmir Rifles nung aniok.

Küm 39 tashi inyaka arudang Lt Gen Dwivedi-i Northern Army Commander (from 2022 to 2024), Director General (DG) infantry aser tanga tongtipang mapa aika inyakogo.

Lt Gen Dwivedi-isa Army Headquarters nung deputy chief aser Himachal Pradesh nung 9th Corps commander ama inyakogo.

**New Delhi, June 11, 2024 (Agencies):** Narendra Modi-i aniba NDA sorkari taruba Chief of the Army Staff (COAS) inyaksü atema Lt General Upendra Dwivedi shimba osang metetdaksüogo.

Lt Gen Dwivedi-i June 30, 2024 nü Army chief, General Manoj Pande ket nungi mapa agizütsü ta Defence Ministry sangdong ka nung ashi.

"Sorkari June 30, 2024 anüngdang nungi Chief of the Army Staff inyaksü atema tang

## National Highway 61(NH-02) shibangtsü

**Dimapur, June 11, 2024 (TYO):** Tuli nung Additional Deputy Commissioner-i National Highway 61(NH-02) nung 185.00 Km nungi 220.00 Km tashi shibangba osang metetdaksüogo.

Mapa inyadkang ali aser lung anenzüka aluba ajanga anogo 15 atema lenmang shibangtsü, ta ADC Relise Sangtam, NCS-i sangdong ka nung ashi.

M/S KKB Projects Pvt. Ltd aser Langpangkong Tsukong

Mungdang ajanga züluba shiditem nung ajemdaker iba tetuyuba agütsür ta pai ashi.

June 11 nungi June 24 tashi anogoshia aonung 11:00 ako nungi anepdang 5:00 ako tashi Merangkong aser Chubarongpang tsüngda lenmang shibangtsü. Iba mapang bangdak ketdangpurtem dang nungi temelaba meshir rongdak mapa atema gari tilatem (Light Motor Vehicles) senzütsü akok.

## NDDP, Media Cell secretary-i Congress nung aden

**Dimapur, June 11, 2024 (TYO):** ULB elections atema NDPP-i ticket magütsüba atema taoba NDDP, Media Cell secretary Khrozote Kapfo-i party toktsür Congress nung denogo.

Khrozote Kapfo-i Dimapur Municipal Council election nung

Ward-8 nungi Congress ticket amer tokteptsü.

"NDPP-i ketdangsürtem dak ang temulung agütsür. Ni takok ngura Medical colony, Railway colony aser Netaji colony jenjang tajungba akümtsü asoshi inyaksü tejangraba lir" ta Kapfo-isa ashi.

## Eastern Nagaland nungi 61 dena candidate 669-i nominations süogo

**Kohima, June 11, 2024 (TYO):** Nagaland nung Urban Local Body (ULB) elections atema candidate 669-i nominations süogo. Parnok rongnung ENPO tesemtem nungi candidate 61 dena lir.

"Candidate 669 nung tetsür 238 dena lir aser Eastern Nagaland dena parnoki municipal 3 aser town councils 36 atema kulikakettem agütsüogo" ta State Election Commission (SEC)-i ashi.

Nagaland nung June 26 nü ULB elections agütsü aser iba ya küm 20 sülen 33% women reservation dena tang mezüng agütsü lir.

Candidate temji NDPP nungi 256, Congress nungi 43, BJP nungi 62, NPP nungi 21, NPF nungi 24, NCP nungi 30, RPI(A)

nungi 7, LJP nungi 6, RPP nungi 1 aser Independents 210 lir.

Külen, Eastern Nagaland Peoples' Organisation (ENPO)-i Frontier Nagaland Territory takhangba atema ULBs election nung shilem magütsü tetuyuba agütsüba anema Eastern Nagaland kübok town councils 14 nung candidate 61-i tenüng agütsüba ajanga mepetmesü adokogo.

Eastern Nagaland nung candidate 61 rongnung tetsür 23 dena lir. Parnok ya NDPP nungi 32, BJP nungi 10, NCP nungi 9 aser Independent 10 lir.

Eastern Nagaland kübok Longleng nung candidate 13, Nagimora nung 8, Aboi nung 4, Tizit nung 9, Pungro nung 8 aser Shamator nung 19 lir.

Osang angazükba agi Eastern Nagaland nung public-i mepelaba ola adokba sülen candidate kari withdrawal letters agütsüogo.

Longleng nung nominations papers agütsüba osang angashiba sülen Phom Peoples Council president Y B Angam-i iba tebilemtsü khuret bena menden nungi sodi agiba metetdaksüogo.

Yimkhiung Tribal Council-ia Bodbarnü iba onük jembitsü atema senden ka jazükogo aser külen Konyak Union-i Mon district kübok nominations asüba candidate 21 jaokba shidi agütsüogo.

June 13 nü nominations reprangtsü aser June 18 tashi nung tenüng meyipa agütsü akok.

## ENPO-i Tribal Councils dang timi angatetteptsü tuyur

**Dimapur, June 11, 2024 (TYO):** Eastern Nagaland People's Organisation (ENPO)-i Eastern Nagaland senso ajak dang tiptema aser süngjema alitsü metetdaksüogo.

ENPO-isa Tribal Councils den asüngdangtepba sülen June 13 aser 14 anogotem ENPO

CEC meeting aser General Session agütsü aliba athiba metetdaksü.

ULB nung tokteptsü bilema liaka nomination masüba candidate ajak nem tenüngsang agütsür aser Tribal Councils-i mangatettep madoktsüsa iba tensa azüoktsü ayongzüker, ta

ENPO President R. Tsapikiu Sangtam aser General Secretary C. Manlang Angto nati sangdong ka nung ashi.

Item tetuyuba sülen anidakra asenoki tensa azüoktetsü aser telongjem bener arutsü akoktsü ta ENPO mendenpurtemisa ashi.

## Higher Education dept-i college bus 5 agütsüogo



**Kohima, June 11, 2024 (TYO):** Department of Higher Education-i Mongulbarnü college bus 5 tashi agütsüogo.

Higher Education Department-i Sao Chang College Tuensang, New Model College Mangkolemba, Zunheboto Govt College, New Model College Wakching aser Peren Govt College nem bus kaka agütsü.

Tanü Directorate of Higher Education, Kohima nung Higher & Technical Education Additional Secretary Sentiyanger Pongen-i bus 5 ji sayatsü.

"College ketdangsürtemi bus garitem tajungtiba nung amshitsü imlar" ta Sentiyanger-i ashi.

"Higher education & tourism minister Temjen Imna Along-i inyakba ajanga college bus pungu aliogo aser iba atema nem tenüngsang agütsür" ta Higher education director Dr. A. Nshoga-ia ashi.

Sorkar dang college bus 19 alitsü shia lir aser taküm department-i bus 5 nguogo. Iba atema state sorkar dang pelar ta Dr. A. Nshoga-isa ashi.

Higher education department atema tayongzüker tulu kaji

transportation lir aser iba ya tajungba akümba ajanga higher education jenjang temabai atutsü, ta paisa ashi.

College teimba ka meta talang pilar lir anungji bus nungdaker. Iba ya ajiteta department-i Nagaland nung aliba college tem asoshi bus agütsütsü meranger, ta Dr. A. Nshoga-isa metetdaksü.

State sorkaria iba asoshi temulung agütsütsü aser shilem lemsar tanungba college tem nem bus agütsütsü imlar, ta Higher Education Director-isa ashi.

# ULB election atema Mongsenbai & Salangtem nungi NDPP candidate sangdong



NDPP candidate Imlisanen Lanuakum NDPP candidate

**Mokokchung, Aami/June 11 (TYO):** Mokokchung Municipal kübok Ward No. 18 - Mongsenbai nungi tang aruya aliba ULB election nung tokteptsü atema Nationalist Democratic Progressive Party (NDPP) candidate, Imlisanen Jamir declaration sentong ka par kidang ayongzüka kaogo.

Imlisanen-i iba sentong nung jembidang, iba ULB election nung shilem agitsü atema ya pai 2016 küm nungi mulungteter liasü aser pa election-i aiba ya Mongsenbai ward yanglutsü aser tejakleni anitsü mulungteter apusor, ta metetdaksü.

Paisa ashiba agi, pa nem

Mongsenbai Ward sangeri yimsü asütsü maongka agütsürabang, Mongsenbai yimden den obang ka sür nüburtemi mulungba nung ajemdaker maparen ajak inyaka aotsü aser kechi terenlok südir süiaka ochi shia inyaksü, ta ashi.

NDPP Mokokchung region aser hon'ble minister, Metsübo Jamir-i pa dak temulung lema NDPP ticket agütsüba asoshi nüburtemi nübu shisatsü agi maneni nungita yaridaksünür, ta pai temepishiba ka ashi.

Küm 5-6 shi Minister, Metsübo Jamir den atongsema arudang tulu aser nübu tajung aika metetepa aruogo, anungji,

parnok teyaritep nung Mongsenbai ward nung nungdakattem inyaksü lemsatepa arudar, ta paisa ashi.

Pai teinyaksü mangdang kar lemsatepdang, anema aliba tsütsü (healthcare), tetsung lenmang, kiyong nung gari lenmang, kilentsü, yimdong nung light tesangwa (street light), jana-ona timi anepalubayim (waste management system), tajemtsü tzu tajung, lanurtem jenjang ajungketba maparen balala, ochi shia inyaksü, nübur ola angadanga lirumedema inyaksü, ta ashi. "Kü mangdang ataloktsü asoshi nüburtemi ni yaridaksünür", ta paisa mepishia ayongzüik.

Longsa nunger Imlisanen Jamir ya Nagaland RD & SIRD Minister, Metsübo Jamir indang PRO liasü. Iba sentong nung Mokokchung Region NDPP President, Mayangnungba, 27 A/C NDPP President, C. Tia Longkumer, NDPP telen balala nungi ketdangsurtem, Mongsenbai yimden, Mokokchung Town Longsa Senso Telongjem, Yimchenkimong Senso Telongjem Mokokchung aser

Lumong/Mongka Nümetong-Tzüwar kidong Ungma item telok balala nungi meyongertemi shilem agia liasü.

Kasa declaration sentongji ka Mokokchung Municipal kübok Ward No. 12, Salangtem nung NDPP candidate, Lanuakümer kidang liogo. Pai iba sentong nung jembidang, NDPP ticket meshiba ama pa dak temulung lema NDPP party aser Hon'ble Minister, Metsübo Jamir-i pa nem maongka agütsüba asoshi pelaba metetdaksü.

Küm 20 dak tali Mokokchung nung ULB election-i magiteti aru, ibaji talisa Municipal Act 2001 nung Naga nunger sobaliba dak maketba tashishitsü onük kar aliba ajanga liasü. Nüburtemi iba anema apuso aser sarkari nübur ola anga-iba act ji intok aser 'Municipal Act 2023' ta sür tasen ka yanglua tanba ULB election ya iba nungji jemdaker agitsü. "Iba act mapa küma aodang yangi nia nübur asoshi, Mokokchung aser Salangtem asoshi shilem agitettsü ta amanga ni iba election nung tokteper", ta NDPP candidate-i ashi. Iba act mapa küma aoba

ajanga Mokokchung aser Salangtem ward tali ajungketa aotsü pa tejangraba lir, ta paisa shisem.

Tang Mokokchung nung nungdakba aser tebilemstü tulu anaji - ka yaküm September ita nungi Mokokchung town nung jana-ona intokdak maka aser tanabuba nung mang aremdak tesem maka küma odar, ta ashi. Pa All Ward Union Mokokchung Town (AWUMT) nung tenzükdang tajangshiba aika ajuruogo, anungji, item tajangshiba nung ajemdaker Mokokchung ajungkettsü atema lenmang karbo sayutetsü imlar, ta paisa lemsatep.

Ward sangertemi pa adokdaksüra külem ward 17 sanger den teka amteper Mokokchung town aser Salangtem ward ajungkettsü tejangraba tulu nung shilem agitsü mulungteter apusor, ta paisa nangzüka metetdaksü.

Iba sentong nung NDPP region nungi, 27 A/C nungi, Salangtem unit nungi, Waromung Senso Telongjem Mokokchung nungi, kinunger, anükabang aser ano tangartemia shilem agia liasü.

## Dr. Ambedkar Foundation Scheme atema metetdaksür

**Dimapur, Aami/June 11 (TYO):** Deputy Commissioner, Peren, Vineet Kumar, IAS ajanga Peren District nung aliba nübur ajunga dang sangdong ka nung ashiba agi Dr. Ambedkar Foundation ya autonomous organization ka lir aser Ministry of Social Justice and Empowerment, Government of India kübok amenok.

Iba Foundation ya ajanga "Dr. Ambedkar Medical Aid Scheme" nungja agütsür January 2024

nungi scheme ka mapa kuma inyaka arur, ta sangdong ajanga ashi.

Scheduled Caste aser Scheduled Tribe nisungtem küm nung kibong indang senpongi sen 3,00,000 dang tajemba aitba nisungtem cancer mesüra takum samatsüsa organ transplant aser spinal surgery ama tashidak tesashi agi timtemer nem medical teyari agütsütsü nükjidong nung iba Scheme ya tenzüik.

Applicant temi medical teyari atema agüja aliba application form mesüra plain paper nung Performa (Dr. Ambedkar Foundation website nung angur) nung shia aliba tejangja zülur post ajanga yoktsüla, ta DC Peren ajanga ashi.

Temsüa aliba applicant temi application ya Foundation dangi yoktsü atema office mapang Deputy Commissioner, Peren indang office nung agütsütsü akok, ta sangdong ajangasa ashi.

## CTC nung Community Conserved Areas Meet June 19 & 20 nü akatsü



June 11 nü CTC nung Nagaland CCA Forum züngsem CTC Principal aser tesayurtem iba sentong asoshi jelia sentong takok ngua agitsü asoshi tanü senden ka mener kelen tangokba noksa.

**Mokokchung, June/Aami 11(TYO):** Clark Theological College, Aolijen Mokokchung nung June 19 aser 20 nü Nagaland CCA forum (NCCAF), Kenono Foundation, L E M S A C H E N L O K , Kalpavriksh, North East Network aser Nature Conservancy teloki-i ayongzüka alima nung tzu mupong, arem shiruru, ozü sangnu aser süngdonglidongtem wazüka ayutsü tasa lentong lemsatepa shisa agiba sentong tajung ka omen "Camaraderie towards Safeguarding our Biodiversity." ta asüba nung ajemdaker akatsüba renemdar.

Anogo ananü iba sentong agiba mapang nung tarutsü anogo aser kümtem nung asenok meimchirtem anisüngzüka litettsüsa tzu mupong, arem shiruru, ozü sangnu aser süngdonglidongtem

wazüka ayutsü aser shisa balala agütsütsü, tajangshibatem lemsateptsü sentongtem tajung renema lira ser iba sentong nung Nagaland tesem balala nungi CCA züngsem, sorkar tenzüker lenirtem aser NGO's balala nungi aruagi adentsü ta iba sentong nung Co-convenor Ruchinilo Kemp ajanga metetdaksü.

Iba sentong nung tesayuba balala agütsütsü aser iba sentong ya plastic free sentong ka asütsü aser iba nungya NCCAF nung register süa alir CCAs aser Nagaland nungi CCAs-temi shilem agitsüta iba sentong Co-convenor Y. Nuklu Phom ajanga metetdaksüogo.

June 11 nü Clark Theological College nung Nagaland CCA Forum züngsem aser CTC Principal aser tesayurtem iba sentong asoshi jelia sentong takok ngua agitsü asoshi tanu senden ka menogo.

## Mangkolemba Town Council election nung tetsür candidate ti lir

**Dimapur, Aami/June 11 (TYO):** Mangkolemba Town Council election 2024 atema tetsür ti-i nominations agütsüogo, anungji iba jila nung wards toku atema candidate 20 akumer.

Parnok rongnung tetsür tenet-i parnok asoshi wazükja aliba Ward 1, 4 aser 7 menden asoshi tokteptsü.

Iba den külemi Ward 9 nung NDPP ticket bener tetsür candidate kati tokteptsü, koba general menden lir.

Par 20 rongnung Nationalist Democratic Progressive Party (NDPP) ticket nungi nisung ti, Indian National Congress (INC) nungi nungi ka aser Independent candidates 11 lir.

**METONGSHITSÜR**  
Tir Yimyim osangkaket Adok 238, June 10, 2024 anogo adokba Tapak 2 nung Dimapur Langpangkong Watsu Telongjem (DLWT) tentetba osang nung tongti zülur Wt. Amongla Imsong (Kangtsüng) aser DLWT kimen Tali Pongener ta metongshia azüngtsü mepishir. Aibelena züluba atema sasar.  
~ Tir Yimyim

NAGALAND POLLUTION CONTROL BOARD						
Signal Point, Dimapur - 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npcb2@yahoo.com						
AMBIENT AIR QUALITY FOR KOHIMA AND DIMAPUR CITY						
KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaksütsüla"
				04.06.2024	06.06.2024	
1	Dimapur	Bank Colony	Residential	33	68	100 µg/m <sup>3</sup>
2		Dhobinala	Commercial	128	144	
3		NPCB Office, Signal Colony	Residential	46	50	
4		Tenyiphe, Chumoukedima	Commercial	28	59	
5		Nagarjan	Residential	44	77	
6		Viola colony	Residential	23	42	
7		Burma camp	Commercial	95	120	
8	Kohima	Opposite NST Office	Residential	36	33	
9		PWD Junction	Commercial	51	68	
10		High School Junction	Commercial	94	77	
11		Midland (Upper)	Residential	43	48	
12		Forest Colony	Residential	46	30	

Iba osang ya nübortem ajangzüksü atema Nagaland Pollution Control Board-i agütsür.

# Gujarat nung BJP MLA 5 tenangzüktepba agiogo

New Delhi, Aami/June 11 (Agencies): Gujarat nung tang yimsü süa aliba Bharatiya Janata Party (BJP) nungi MLA pongu, shirnoki tawa agiba by-election kokogo, parnok Mongolbarnü Gandhinagar nung office nung tenangzüktepba agiogo.

MLA pongu rongnung Congress party toktsüba MLA pezü densema lir. Parnok ya Chief Minister Bhupendra Patel matsüngdang assembly Speaker Shankar Chaudhary-i achaayanga pa indang office nung tenangzüktepba agia liasü, ta official sangdong ka ajanga metetdaksü.

2022 küm December ita election agiba mapang BJP-i menden 182 nungi 156 koka Gujarat nung sorkar kümteta liasü. tang MLA pongu

bendenlokba sülen assembly nung parnok MLA 161 kümogo. MLA Arjun Modhwadia, CJ Chavda, Arvind Ladani, Chiragkumar Patel aser Dharmendrasinh Vaghela nung tenangzüktepba agiogo.

Vaghela ya Vaghodia nungi independent MLA liasü aser tanungba pezü ya 2022 assembly election nung Congress ticket amer toktepba BJP candidate tem koker alirtem liasü.

Parnoki 2023 küm December ita aser 2024 küm March ita tsüngda MLA mapa toktsü aser BJP nung dena liasü, iba ajanga Porbandar, Vijapur, Manavadar and Khambhat assembly constituency tem nung by-election agitsü nüngdaka aküm.

BJP-i, May 7 nü agiba by-election atema tanga party

toktsür parnok den adenertem pei menden nungi tokteptsü atema shima liasü.

Porbandar nung Modhwadia-i vote lakh 1.16 dak tema agi takok angu. Pai vote 1.33 lakh angu aser Congress candidate Raju Odedara-i vote 16,355 angu.

Vijapur nung Chavda-i Congress candidate Dinesh Patel vote 56,000 dak tema agi akok aser Manavadar nung Ladani-i Congress candidate Haribhai Kansagara vote 31,000 dak tema agi koka liasü.

Khambhat aser Vaghodia candidate Chiragkumar Patel aser Dharmendrasinh Vaghela natia takok tajung nguogo.

Tenati Congress candidate Mahendrasinh Parmar aser Kanu Gohil na vote 38,000 aser 82,000 dak tema agi koka liasü.

# China den arrtsü ken o bentettsü atema rangloker inyaksü: Jaishankar



China den arrtsü ken o bentettsü atema rangloker inyaksü: Jaishankar

New Delhi, Aami/June 11 (Agencies): India sorkar tasenbai Line of Actual Control (LAC) nung China den ken o mebenteti bangdaker aliba dak rangloker inyaksü, ta external affairs minister S Jaishankar-i Mongolbarnü ashi. Pa tang agi tanabenbuba iba mapa atema shimogo.

Pakistan Ato Kilonser Nawaz Sharif-i, tesempatep ya timla agi melentsü atema osang yokba dak sendakba nung, Ato Kilonser Narendra Modi-i, India nung kümzüka toktsütsüji ajak dang tongtibangtiba asütsü ta telangzüba agütsüba sülen anogo ka lir Jaishankar-i ashiba agi, Pakistan den ken o tongtibangtibaji arrtsü adena kiralongrartem yokba ya lir, koba kidanger tajung kati benoka inyaksüba policy ka masü.

Jaishankar-i ashiba agi, Modi-i aniba sorkari term asemubaba yimsüsü tenzükba mapang India ya "Vishwa Bandhu" (alima tembar) ama jenjang yanglutsü atema "Bharat First" aser "Vasudhaiva Kutumbakam" (alima ya kibong ka dang) ya India indang foreign policy lenitsü atema tongtibang onük ana asütsü.

"Pakistan aser China na dak sendakba ken o ya balala lir, aser parnok den asenok tesendaktepa balala aser tebilemtsüa balala lir," ta

Jaishankar-i TV news channels ka den sensaksemba mapang ashi.

"China dak sendakba nung arrtsü nung tensa mejungi aliba dak rangloker inyaksü.. ken o kar mebenteti lir, ajungji iba ya kodaser bentettsü aji asadangtsü," ta pai ashi.

2020 küm May ita nungi China den mangatettep tenzükba sülen Jaishankar-i, China-i LAC nung sepai aika anidena border management dak sendakba nung tenangzüktepba yanglur aliba nung aibelenogo, ta shia arudar. Paisa, arrtsü nung yimjung aser tesunep bener maru tashi India aser China na tesendaktep tajungba makümsü, ta ashi.

Kasa mapang nung China-i, arrtsü nung mangatettep aliba ya agina toktsür, shishilemba aser senotsü intokba amala tanga lenlatem nung tesendaktep tejakdangi bener aotsü ayongzükogo.

Linük ana tsüngda aiben sensaksemaka China-i LAC kübok Depsang aser Demchok nung mangatettep aliba bentettsü atema tejangraba maliba sayuogo.

Pakistan dak sendakba nung Jaishankar-i ashiba agi, küm aika ken o tongtibangtibaji arrtsü adena kiralongrartem yokba ya lir. "Asenoki kodaser iba ya bentettsü atema inyaktettsü, kechiyong iba ya kidanger tajungka kati benoka inyaksüba police ka masü," ta Jaishankar-i ashi.

# G7 Summit atema PM Modi Italy-i iba hopta aotsü

New Delhi, Aami/June 11 (Agencies): Ato Kilonser Modi, G7 advanced economies annual summit nung adentsü atema iba hopta Italy-i aotsü. Term asemubaba atema PM mapa agizükba sülen Ato Kilonser tang mezüngbuba bendangleni aotsü.

G7 summit ya Italy nung Apulia tesem kübok Borgo Egnazia luxury resort nung June 13 nungi 15 tashi agitsü, kong Ukraine aser Gaza rara indang tongtibangsa jembitsü imlar.

US tir Joe Biden, France tir counterpart Emmanuel Macron, Japanese Ato Kilonser Fumio Kishida aser Canada Ato Kilonser Justin Trudeau nungeria iba senden nung shilem agitsü.

Kasa mapang nung Russia-i Ukraine amakba dak sendakba nung Ukraine tir Volodymyr Zelenskyy-ia o jembitsü renema lir.

Ken o jangja alirtemi ashiba agi, Modi June 13 nü Italy-i apusoa aotsü aser June 14 nü meyipa arutsü.

Modi-i Italy semdangtsüba indang tang tashi nung officially sangdonga mali.

Modi meina External Affairs Minister S Jaishankar, Foreign Secretary Vinay Kwatra aser NSA Ajit Doval nung den semma tongtibang lenirtem aotsü imlar, ta source-i ashi.

Summit nung shilem agiba mapang PM-i, Italy PM Giorgia Meloni densema tanga lenirtem den senden amentsü imlar.

Modi-i, taoba küm Hiroshima nung G7 summit amenba mapanga shilem agiogo.

Summit nung shilem agiba mapang pai Zelenskyy densema tanga lenirtem aika den sensaksemba liasü.

G7 nung US, UK, France, Italy, Germany, Canada aser Japan densema lir.

1997 nungi 2013 küm tsüngda iba bloc nung Russia-a züngoksema G8 aküm saka Russia-i Crimea amakba sülen 2014 küm agin.

Taküm iba senden atema India densema Italy-i, Africa, South America aser Indo-Pacific nungi linük 11 jaokogo.

European Union ya G7 nung shilem ka masü saka parnoka annual summit nung shilem agir.

# Andhra Pradesh: Pawan Janasena Legislative lenir asütsü shimogo

New Delhi, Aami/June 11 (Agencies): Janasena Party-i Mongolbarnü, party tekolakba Pawan Kalyan, Legislative Party lenir asütsü shimogo.

Mongolbarnü Mangalagiri kübok party headquarters nung party MLA tem ajak senden ka amenba mapang iba onük ya benoka agizüka liasü. MLA 21 prongla iba senden nung aden aser parnok ajaki Pawan Kalyan shimtsü atema mulunga agizüka liasü.

Kasa mapang nung Mongolbarnüa Vijayawada nung National Democratic Alliance legislative party senden ka amenba mapang Janasena Party tekolakbai, Andhra Pradesh chief minister mapa abentsü atema N Chandrababu Naidu tenüng benoka liasü.

Iba onük ka BJP state tir aser tawa shimba MP D Purandeswari-ia pusama liasü aser ajaki mulunga Telugu Desam Party tekolakba ya House nung alliance indang lenir asütsü shimogo.

Andhra Pradesh Assembly elections nung TDP, Janasena

Party, aser BJP nung NDA ama toktepogo aser parnoki menden 175 nungi 164 koka liasü. TDP-i menden 135, Janasena Party-i 21 aser BJP-i menden 8 koka liasü.

Senden nung o jembiba mapang Naidu-i nüburtem dang kanga pelaba lemsatepa liasü. "BJP, Janasena aser TDP nungi MLA ajaki NDA sorkar kübok ni Andhra Pradesh indang Chief Minister akümsü atema mulunga agizükogo, ta pai ashi.

"Iba ama takok ya ni kodanga m a j a n g s h i d a n g . Nüburtemi onok pusamba ajanga Delhi nung ajaki onok nem akümsüba agütsüogo. 1994 küm election party kati dang amokbanger agi. Iba mapang nunga onoki menden paika yabo makok. Onoki menden

164 kokogo. Onok menden 11 nung dang tamakok angu. Ya menden shilem 93 lir. Election nung average voting percentage 57 per cent liasü. Onok khuret tali kümogo," ta Naidu-i ashi.

**DIMAPUR BRANCH**  
Nyamo Lotha Road (Church Road)  
Dimapur- 797112, Nagaland,  
Email: dimapu@bankofbaroda.com

**GARI TAYOKTSÜ LIR**

**YUNGMEI KONYAK** nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir.

Iba gari alitsü jangrartemi tsüngtong arua gari asadangtsü aser gari indang osang tejangja agitsü atema ken o dak sendaka aliba ketdangsur den tongteerateptettsü. Offer shiti den gari atema Earnest Money Deposit (EMD) ama sen **65,000/- (Rupees Sixty Five Thousand Only)** refundable/adjustable Banker's Cheque/DD benoktsüla. Gari alitsü tebilemba alirtemi gari atema offer letter sealed envelope ka nung **"Quotation for purchase of vehicle No. NL-07/CC-6843"** aser teküboklen shisema aliba gari tenüng zülur ketdangsur nem **15.07.2024** nü nikonngtsütsü 4:00 ako tashi nungbo benoktsüla. Sealed quotations ya **15.07.2024** nü nikonngtsütsü 5:00 ako nung Bank of Baroda, Dimapur Branch nung gari alitsü tebilemba aliba nisungtem matsüngdang lapoktsü. Bid takok ngua asuri quotation lapokba anogo nungi tenzükur anogo 05 (pongu) tsüngda sen agütsütsüla mesüra Branch tekolakbai atakzüksüba mapang tashi nung benoktsüla, ajita mesüra pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i lateja aliba jenjang dang nungi tekübokba nung mayoktsü. Ken o dak sendakba nung tashi agüja aliba ketdangsur ket nung kuli kecha magütsür offer tem agizüksü mesüra magizüksü atema tashi lir. Gari ya mapang inyakba anogotem nung Bank inyaksangshia aliba mapang asadangtetsü.

Sl.No.	Vehicle Make and Description	Reserve Price
1	<b>NISSAN MAGNITE MT XV (NL-07/CC-6843)</b> Engine No.: B4DF424E051485 Chassis No.: MDHFBADDOP9108500 Year of Manufacture: 09/2023	Rs. 6,50,000/-

Date: 12.06.2024  
Place: Dimapur

Branch Head  
Bank of Baroda, Dimapur Branch

**DIMAPUR BRANCH**  
Nyamo Lotha Road (Church Road)  
Dimapur- 797112, Nagaland,  
Email: dimapu@bankofbaroda.com

**GARI TAYOKTSÜ LIR**

**IMKONGSUNEP** nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir.

Iba gari alitsü jangrartemi tsüngtong arua gari asadangtsü aser gari indang osang tejangja agitsü atema ken o dak sendaka aliba ketdangsur den tongteerateptettsü. Offer shiti den gari atema Earnest Money Deposit (EMD) ama sen **2,45,000/- (Rupees Two Lakhs Forty Five Thousand Only)** refundable/adjustable Banker's Cheque/DD benoktsüla. Gari alitsü tebilemba alirtemi gari atema offer letter sealed envelope ka nung **"Quotation for purchase of vehicle No. NL-07/CC-6043"** aser teküboklen shisema aliba gari tenüng zülur ketdangsur nem **15.07.2024** nü nikonngtsütsü 4:00 ako tashi nungbo benoktsüla. Sealed quotations ya **15.07.2024** nü nikonngtsütsü 5:00 ako nung Bank of Baroda, Dimapur Branch nung gari alitsü tebilemba aliba nisungtem matsüngdang lapoktsü. Bid takok ngua asuri quotation lapokba anogo nungi tenzükur anogo 05 (pongu) tsüngda sen agütsütsüla mesüra Branch tekolakbai atakzüksüba mapang tashi nung benoktsüla, ajita mesüra pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i lateja aliba jenjang dang nungi tekübokba nung mayoktsü. Ken o dak sendakba nung tashi agüja aliba ketdangsur ket nung kuli kecha magütsür offer tem agizüksü mesüra magizüksü atema tashi lir. Gari ya mapang inyakba anogotem nung Bank inyaksangshia aliba mapang asadangtetsü.

Sl.No.	Vehicle Make and Description	Reserve Price
1	<b>ISUZU V CROSS 4WD MT Z (NL-07/CC-6043)</b> Engine No.: AAG662 Chassis No.: M3GTGS876PB200115 Year of Manufacture: 04/2023	Rs. 24,50,000/-

Date: 12.06.2024  
Place: Dimapur

Branch Head  
Bank of Baroda, Dimapur Branch



# TIR YIMYIM

## YIMOBILEM (EDITORIAL)

DIMAPUR RASEMNÜ, JUNE (AAMI) 12, 2024

### Modi 3.0 balaka asütsü

- P Tiamongba Aier

India nung party kati dang sorkar yimsü süa aruba mapang süiogo aser ibaji taoksatsü aketba 2024 general election results ajanga sayua liasü. Joko linük nung Modi 3.0 ta ajaba sorkar nung party teloktep ketdangsübaren tenzükogo. Election magidang BJP-i menden 300 tema nung takok angutsü ta shia aru saka parnoki sorkar akümtsü menden 32 metongteti menden 240 nung dang takok ngua liasü. Modi 3.0 sorkar ya tesüiba BJP-i aniba NDA sorkar kümsük ana den khenyongi balaka asütsü kechiyong tesüiba kümsük ana nung NDA nung adenba tanga teloktemi shilem kecha magiteti aruogo. Tangbo Modi'er sorkar ya TDP tanishir Chandrababu Naidu aser JD-U president Nitish Kumar nati anir tanüంగా party tem dak tulu ka keta lir. Züngsem 72 agi akümba Union Council of Ministers nung NDA nung adenba tanga teloktem nungi MP 12 dena lir aser parnok pungubo Cabinet Minister tem lir. NCP dak alaka NDA nung yaritepba telok ajak Union Council of Ministers nung denogo. Sorkar ketdangsübaren memelenshitsü mechi nung PM Modi-i BJP nung pai mulung adokba nisungtem maneni shimokogo. Parnok ya Rajnath Singh, Amit Shah, Nitin Gadkari, Nirmala Sitharaman aser S Jaishankar nung lir. Modi-isa taoba chief minister tem-Shivraj Singh Chauhan aser Manoharlal Khattar na aniokogo. Sorkari mezüంగా anogo 100 atema sentong renemogo aser iba ya election results madokdang yongi renemba lir. Results madok tashibo BJP-i '400-paar' tangatetba nung dang aru saka coalition politics inyaksüsa tensa ka ajuruba ajanga Modi-i Uniform Civil Code (UCC) amala onüktem tezülen yua atatsüsa akümtsü. 2000 nungi Gujarat chief minister inyaksü tenzükba sülen 2014 aser 2019 Lok Sabha election tem nung takok tulu anguba ajanga Modi-i tashi kanga amshia aruogo saka tan sorkar kümsük nungbo pa inyaksangshiba yimya melenshitsüsa akümtsü. Modi 3.0 sorkar nung portfolio lemogo aser tanga tongtipang mapa ka inyaksü alibaji Speaker shimtsüba lir. NDA nung yariteper TDP-i iba menden meshir saka BJP-ia iba tongtipang mapa inyaknür. BJP-i political party tem loksatsüba ya TDP aser JD-U teloktemi kanga junga meteta lir kechiyong telok anaprong Operation Kamal ajanga timtem ajuruogo. Anungji Speaker menden anguba ya telok ka nungi kati mesüzüka anir aoba inyakyim nungi kümzüka ayutsü atema asütsü. 17 buba Lok Sabha nungbo ruling party BJP-i Opposition olatem nembangja dang aruogo. Ajisüaka, 18 buba Lok Sabha nungbo ruling party aser Opposition tsüంగా tepila melii inyaksangshia aotsü imlar. Tan Lok Sabha nungbo Deputy Speaker ka shimtsü ama bilemer aser Congress-i menden aika nung takok anguba ajanga Leader of the Opposition mapa angutsü imlar. NDA sorkar kümsük tasembuba ketdangsüa aodang Narendra Modi-i Atal Bihari Vajpayee nungi tangazüktsütem bener inyaka aotsüla kechiyong Vajpayee-i coalition government madak kanga junga ketdangsüa liasü aser parnok den yaritepba teloktem nungi tebilembatem agizüka inyak. NDA-i common minimum programme ka renemtsüla aser parnok len anitsü atema convenor ka shimtsüla. Nübo peria maliba Modi 3.0 sorkar tali ajemalua akümtsü aser tangari ashibatem angaa ketdangsüa aotsü imlar. Külen, Opposition-ia Parliament senden nung medeni lungkak aitba yimya anentsüla aser tashitait Opposition ka ama tongtipang shilem agitsüla. Taküm Lok Sabha election ajanga nübortemi tashishitsü maliba sorkar ka aser tashitait Opposition ka aginüba sayuogo.

## OLEMSABANG

### AOLI WATSÜ MUNG DANG TENZÜKBA OTSÜ TATSÜ AGI

~ Wt. Meyisongla, Rtd. Deputy Director  
Nursing Nagaland, Kohima

(Yashi adok nungi...)

Iba tented nükjidong:-

“Telongjem aser terenlok “ (Unity & Progress)

**Objective:**

1. Aotsür rongnong tali telongjem akatsü aser tejakleni aotsü.
2. Aor sobaliba, loktiliba, yimtem, Tamangba yimsü, yimya – yimpong aser Libaliro ajak nong terenlok aser tajungba küma yanglushitsü asoshi.
3. Iba tentet ya Non political, Non Religion, Political party aser tamangba yimsü kecha dena palala aroka tesentaktep malitsü ta lemtet.
4. Iba lok linnertem (Officers aser Executive) Aotsür temeja senso tajung sobaliba nong tarak maket tang agitsü-ta lemted.
5. Iba telok nungja-asoshi yimtsü yimbo shisakar aika den shisa asüంగా dang lemteper iba dang ya “WATSÜROGO MUNG DANG” ta ajatsüjanger ta asür Rev. Taküsüంగా Ungma-i shisatetsü, ozü rongnong chuba aser apuani kümteta alibaji TENEM ozü ya lir. Tebur waluner aser yimsüsür tetemjen dang wabongta ajar. Aser kününgtsü dang watsü ta ajar, shiba shisatsü aser sempet agi pa kününgbo yimsüsüba ajak nong shisa tajong agüja nongiter yamaji tetemsü, takotet tetsür dangji WATSÜ ta ajar. Anungji Aotsür tashitemeteter tetemjen aser takotetemi aniba lok dangji WATSÜROGO mung dang ta ajatsüji kanga tapet lir.

Item ajak ozüంగా takang yanglua yur mezüంగాpuba Ter. Wt. Temsüsola aser tezülur Wt. L. Bendangla tenati mapa ajak temi anir watsü mung dang tenzük.

Atangji ibai tetsür telok kümtet. Saka tebur tashitemeteter, yimsüsür aser shisakar aikati nongeta yaritepa tanü tashi arudagi. Ibagi watsü mung dangi mapa tajung jenti inyakogo ano manini awa-oa inyaksü belemer.

Tenüంగా tajungbo watsü mung dang agir, saka iba nong inyakertemjibo Aotsür Aor tila tulu, arogo aser govt. workers ajak tena lir. Iba mung dang tenzük küm 40 sür ta arur. Iba mapang watsü mung dang nong Tir, tezülur aser Executive membortemji highly educated aser shisa kartemi aniba agi tanü tashi mapa tulu aika nong takok ngua arudagi. Iba watsü mung dang ya tetsürtem atema dang masü asen nubur aika atema eye opener lir.

Iba telok lennitsü atema “INSIGNIA” office seal 1988 küm nongi yanglua amshir. Ano Watsü sübosolemtsü uniform lateta amshir.

Ano kü “mera Aoli” ta sür watsü Anthem, wabong I. Aküm Kichui mejemba ken tena iba mung dang anir.

8<sup>th</sup> September 1995 nongi Watsü Tir zük “Wangküm” nüngo ka yanglua amshidagi. Iba Wangküm ya agi Aolitsü nütsüంగా nübur jenti nong la Tir ta shisang shisanga metettsü asoshi. Aji dang masü, mung dang nong tongtipang onük jembidang, la tangatet shisatsü agi ochi o bendang agütsütsü. Iba azük ya lai menden agizük nü nongi, menden doktsüla dang nongi agizüker. Anungji kodangsa watsü tongtipang o lemtepdang obang mapu adokdang ochi o bendang agütsütsü. Aser mung dang mapang iba azük azüktsü. Ibaa azük shingiaia copya mazüktsü, mesüra shipelena mamshitsü. Ibai meraket zük aser tetezü tulu aketba Aotsür “WATSÜ WANGKÜM” lir ta metetdaksür.

“WATSÜ MUNG DANG LENIPIR” temji Educated, tangatet mapa tashi ajemalu, Tsüంగాrem metetba, aser Arogo nong nongeta yaritem aika lir. Iba mung dang tenzük joko küm lirsür ta aor (40 years above) saka tanu tashi onok rongnong tamajung mangatetep kecha mali. Onok tarutsü nükla tulu lir. Nenok ajak dang onok atema sarasademjangjang. Nüంగాdak süra onok nem tajongshiba agütsüdaktsünür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüంగా angateta agitsü mepishir

## Nigeria nung pastor, kinungtsü aser tamanger asem tepset



Pastor Dauda Dalyop, pa kinungtsü Chummy Dauda

**Abuja, Aami/June 11 (Agencies):** Fulani shiruru metsürtem südi ta temulung melemi aliba nisungtemi Plateau state, central Nigeria nung June 2 ayatirm nung pastor ka, pa kinungtsü aser tamanger asem tepset, ta osangtem ajanga ashir.

Item nisungtem ya nok-nü tesashi bener arua Kwall District, Bassa County nung Khristanpur yimtsüng ka amak aser iba mapang Assemblies of God Church nung arishi küm 63 tain Pastor Dauda Dalyop, pa kinungtsü arishi küm 57 tain Chummy Dauda, arishi küm 26 tain Chwe Ajuhs, arishi küm 45 tain Joshua Kusa aser arishi küm 43 tain Rikwe Doro nung tepset, ta Plateau state nung Khristan ethnic telok kübok Irigwe Development Association indang odongtar Sam Jugo-i ashi.

"June 2 ayatirm nung Fulani shiruru metsürtemi Kwall District kübok Kimakpa area nung aliba Ari Songo yimtsüng amakdang yimtsüng nung alir nisung pongu tepset," ta Jugo-i sangdong ka nung ashi.

"Tamanger ana kanga sashia yiru aser tang Jos nung mozüki ka nung temang anepaluba mapang lir."

Nigerian media nung sangdong ka nung Jugo-i lendong agütsür ya "criminal invaders" ta dang shia liasü.

Christian Daily International-Morning Star News ajanga asüngdang dang pai sangdong agüja aliba melenshia parnok ya "Fulani shiruru metsürtem lir" ta ashi.

Anogo ana tejakdang shiruru metsür telok kati kasa Kwall tesem nung Khristan ana meita atar amak, ta pai ashi.

"Shiruru metsür telok kati Khristan ana atsüka atar amakba nung Irmiya Musa Timbi tepseter ka yirutsür anogo ana dang lir iba lendong ya atalok," ta Jugo-i ashi.

Iba tesem nung pastor, Rev. Ronku Aka aser Bassa nung council ketdangsür Fidelis Adara natia iba lendong atalokba indang shia liasü.

Evangelical Church Winning All (ECWA) ajanga Nigeria sorkar dang tanen maka tepsetba bushisüngdanga azüdokshi tatem kumdaktsütsü ayongzüka liasü.

Rev. Akus Odoh of ECWA, Miango District Church Council ajanga tang tesüsa azüdokshiba khukhua aitsü aser bushisüngdangtsü ayongzüka liasü. "Nigeria indang jenjang samaogo aser sorkari takum alitsü temeden akumtsübo masür," ta Odoh-i ashi.

Plateau State Police Command indang odongtar Alfred Alabo-ia pastor densema nisung pongu tepsetba indang ashi.

"Commissioner of police iba lendong atalokba tesemi ao aser iba ama lendong tanaben mataloktsü atema police yoka lir. Iba tatalokba indang osang tali tejangjaba metetsü atema yangji aliba nüburttem den külemi inyaker," ta Alabo-i ashi.

Alima nung Khrista sülen anidaktsü atema Nigeria ya tamajungtiba linük lir, kong October 1, 2022 nungi

September 30, 2023 tsüngta tamangba yimsü mechi nisung 4,118 tepset, ta Open Doors indang 2024 World Watch List osang nung ashi.

Danga linüktem dang nungi Nigeria nung Khristanpur timtiba (3,300) pua bener ao.

Tekülem ki aser ano mozüki, school aser leper ama Khristanpur ki o jen nung amakba nunga Nigeria ya tematiba (750) lir, ta report ajanga ashir.

2024 World Watch List nung Khristanpur alitsü atema tamajungtiba linüktem rongnung Nigeria ya jenjang 6 buba nung lir, koba taoba küm den kasa jenjang alitsü.

Muslim Fulani nunger ya kidong noklang aika nungi jakzüka lir aser parnok ya million aika Nigeria aser Sahel nung alir aer parnoki Islam yimsü kanga arokabo mamshir, saka Fulani kari radical Islamist ideology amshir, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung ashi.

"Parnoki Boko Haram aser ISWAP den tasa mesüktepa amshir aser Khristanpur aser Khristanpur maitsü nung tenük yokba tejangja sayur," ta APPG report ajanga ashir.

Khristanpur li tashiyim amshia agir Islam yimsü benoktsü tejangraba nung shiruru metsürtemi Nigeria indang Middle Belt nung Khristanpur dak amaker, ta Nigeria nung aliba Khristan lenirtemi ashir.

## ANOGO ABEN TSÜNGREM DEN

## Tatem Maka Taküm

- 1 Yohan 5:13

Asenok tekümtet takümji tetenzükba temoatsü lir. Tanü Lai jagi Khrista akaba tetezü taküm akaba ta sayur, kechiaser takümji techir dak lir. Iba taküm tongtipangji tanelaren lir aser ibaji agütsü kechiaser shirnokisa amanger ajak nem Pa taküm agütsütsü asoshi Kibuba Yisu asü aser shia aru.

Tanü Lai jagi iba takümji "teti tatem makaba taküm" ta sayur. Ano o ka nung "teti tatem maka takümji" Tsüngrem maongka ta ashitsü akok. Taküm nungdak ajakji meküta Adam dangi aor shibai pa menen asoshi tasüba timtem angu. Adam tashi meiti küma pa shi temang asütsü tenzük. Saka asüba tetezü langzüksü mokoki akümba masü. Iba tetezü pilaba. Asüba ajanga tanela aser takümji shi temang nungi pilar aser temangji shizüka aor. Tanelaren asübajia Adam temenen ajanga adok. Pai temenen mena nung Tsüngremi pa Eden nungi aridok. Nisung aser Tsüngrem pila aser Tsüngremi pa sobutsütsü asoshi temelen ka magütsü asübo Adam teti asoshi sür lila.

Teti tatem maka takümji tetenzük aser tatebangmaka. Asenoki ibaji amangba second nungji agizüker kechiaser idakjisa Khrista aita alir. Melentepba ajanga asenok tasü nungi Tsüngremer taküm kadaktsür. Teti takümji tetenzük lir saka tatebang maka. Asenok temenen tatokba asoshi amangba second nungi asenok taküm alitsü tenzük. Ozüng raksaba aser temenen ajanga asenok tasü liasü, saka Tsüngremi pei chir sempet agütsüba ajanga asenok taküm lidaktsü. Tsüngrem chir dak amangba anogo nungi teti tatem maka taküm aser teti taküm anapronglaji tenzük.

Iba taküm tejangja alibaji leman ana nungi jangjatsü akok. Mezüngbuba aser tongtipangtibaji Tsüngremi Pa O nung nangzüka ama tamang kateta aliba ajanga lir.

Tanabuba kuliji nisung shia taküm libaliro aser mapa, chiyongtsü jangraba, mapa inyakba, mapa inyaktsü mulungtetba aser jakla ajanga kuli sayur.

Oba, Nai Ne chir ajanga taküm agütsüba asoshi Ne tenüng asanger. Ne tenangzükbatem nung ni mulung lemtetta ali nung ni iba taküm kar ta ni metet.

## Pakistan nung tekolok meshidak Catholic tsür ka tepuokdaki yok

**Lahore, Aami/June 11 (Agencies):** Arishi küm 60 tain Catholic tsür ka tekolok meshidakba atema Pakistan kübok Lahore yimti nung temang anepalua arur tamangba yimsü mezüngmeshiba ken o nung tepuokdaki yok.

Muslim nunger dokan kibur Asif Ali-i ashishiba nung ajemdaker June 4 nü Jameela Khatoon ya Lahore indang Cantonment area nung lar kidang nungi pua bener ao, ta lar chir arishi küm 41 tain Sunny Gill-i ashi.

Prophet Muhammad mezüngmeshiba anema yangluba blasphemy law indang Section 295-C kübok First Information Report (FIR) ya Ali-i North Cantt Police Station nung benoka liasü.

Iba ozüng kübok Muhammad mezüngmeshiba atema tasüba

temerenshi agütsür.

Iba tesem nung dokan kibur temi Khatoon tekolok meshidakba indang meteta lir aser lar kinunger temi meilongi menoktsü ta meteta la dang sen memeshi lai aginüba oset agidaktsür, aser la Ali'er dokan- i arua jara nung Muslim nunger sarasadem zülua aliba ngua Muhammad anema o tamajung jembiba sülen Ali-ia la tekolok meshidakba meteta liasü, ta Gill-i ashi.

"Ali-ia la shirangba meteta lir aser pai la anema ken o benokba ngua süngmanger," ta Gill-i Christian Daily International-Morning Star News dang ashi.

Pa tetsüi dokan jara nung Arabic Durood Shareef Islamic sarasadem neploka aliba angu aser Muhammad anema o tamajung jembiba tenzük aser

Islam indang prophet dang nungi Khrista tuluba ta shia ayimten tenzük, ta pai ashi.

"Ali aser daga Muslim nunger kari kütsü dang tamangba yimsü mezüngmeshi asüba anendaktsütsü merang aser la lar ki leni ao saka Muhammad mezüngmeshi ta FIR nung shia lir," ta Gill-i ashi.

Khatoon'er tanur pezü rongnung tambosang Gill-i ashiba agi, iba mangatettep ataloker ghonda ana lir police tem par kidangi arua tetsü pua bener aodang pa kidang meliasü. "Police temi kütsü ya auyaba mechi pua bener aor ta ashi aser onok shingai kechi atalokar memeteti liasü," ta pai ashi.

Küm pezü tejakdang nungi kütsü tekolok meshidaki akum tenzük, ta Gill-i ashi.

"Onoki la temang anepalutsü

atema Punjab Institute of

Mental Health bushia aiben bener ao saka la temang tajungba makum," ta pai ashi.

"Onoki la kilung nung dang ayutsü merang, saka lai memulung aser ain adok," ta ashi. Police aser court ajanga kütsü tekolok meshidakba angateta ken o agientsü imlar, ta Gill-i ashi.

Khatoon tekolok tendangtsü asoshi medical board dangi yoktsü zülutsü, ta Khatoon asoshi okatsür Attorney Liaquat John-i ashi.

Pakistan nunger ozüng nung tekolok meshidak mesüra matamabensar anema ken o mebenoktsü shia lir.

Ajidang masü FIR nungya lai Islam indang prophet anema o tamajung jembiba ta tai tongloktsüba kuli mali, anungji la indang health grounds nung ken o magienra bail angutsü, ta

John-i ashi.

Iba tatalokba sülen Bael Ahata kiyong nung aliba Khristan kibong 40-45 shi tetsübo nung pei ki yutsür jena ogo. "Muslim nungeri longkak maittsü ta police-i shiaka onoki iba kiyong nung talisa Hokulbarnü Muslim nunger adenshia sarasademba mapang police yoktsü mepishiogo," ta John-i ashi.

Gill-ia iba tesem nung alirtem nungi par kinunger amokmerenba mali ta ashir.

"Iba tatalokba atema Muslim nungeri longkak aitba meliaka Khristanpur aika jena ogo," ta paia ashi.

Open Doors ajanga alima nung Khristanpur alitsü linük tamajungtiba 50 asadanga 2024 World Watch List nung Pakistan ya jenjang tenet buba nung lir.

AO OSHI ANGAZÜKDAK: TANÜ ANGAZÜKTSÜBA OJANG



Sütang

(Adj) süng agi lenti noktang

\* Longkak aitertemi gari moutettsüsa süng tulu agi lenti sütanga yutsü.

Sütep

(Adj) asoajen kasa, putepputeper(matching)

\*Asangursangi pa den sütep aiür ka angu.

OLONG PAITEP # 6815

Grid for OLONG PAITEP # 6815 with numbers 1-15 in various positions.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6814 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.

Advertisement for 'Tepela Tasoba Anogo' featuring a birthday cake and a list of items to be filled in: 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang.

Rs 13.44 lakh alang kozüjang apu

Aizawl, June 11, 2024 (Agencies): Mizoram kübok Champhai district nung Assam Rifles aser Customs Department ketdangsürtemi ozüng alema shibelenba kozüjang aika puogo.

Iba mapang arishi küm 41 tain Khalthang Lalroupuia (Michael) apu. Pa ya Tlangsam nunger aser nok ka amer pai ketdangsürtem anema noktak.

Iba mapang bosta 24 nung kozüjang bena alilba apu aser iba indang jenjangji Rs 13.44 lakh shi alang liasü.

Kozüjang ajak Champhai nung Customs Department ket nung agütsüogo.

ONSARA PELAR

Teyarinü aser mulungso yimlisür wabong tajung lmtisusu Longkumer (Kelingmen) ajungbena akümüli wadang June 4, 2024 anogo nung tembanga kidang kimang rangpen taoksa terata tia nung alidang Kelingmen aser Mongsenyimti Senso Telongjem Dimapur temi anir lokti, kija temeimertem, külem lisemertem aser aria bilemetsürtem shirnokisa terajem shisa bener ozü asükhu mangyim nung mulungsoa yaritepogo ajak dang iba osang kaket ajanga onsara pelaba lemsateper.



Nenek mapa aser teyaritep tajung taküm Tsüngremi shilua moatsütsü ozü tamang sarasadem.

Temeim Kinungtsü, Jala, Jabasotem aser Kinungertem.

'Atmanirbhar Asom Abhijan' ajanga entrepreneurs 30,000 yaritsü



Guwahati, June 11, 2024 (Agencies): Assam sorkari 'Atmanirbhar Asom Abhijan' (Self-Reliant Assam Campaign) tenzükogo aser iba ajanga taküm September ita tashi nung entrepreneurs 30,000 yaritsü

nükjidong lir. Iba campaign nung shilem ka ama entrepreneur shia nem mezüng atema Rs 1 lakh agütsütsü aser iba ajanga parnoki shishilembaba tenzüktsü. 'Atmanirbhar Asom Abhijan'

ya Assam nung lanurtem self-reliance tsütsü anitsü atema lir. Parnoki mapa adokertem akümütsü aser state rongsenketzüng renlokba nung shilem agitsü atema iba mapa tenzükter.

Assam Congress MP Rakibul Hussain-i MLA menden toktsür

Guwahati, June 11, 2024 (Agencies): Taküm Lok Sabha election nung Congress lennir Rakibul Hussain-i takok tulu ngua liasü aser iba ajanga pai June 11 nü Assam assembly nungi anenogo.

Hussain den tepila sentong ka agia liasü. Tesüiba nung Assam Chief Minister Himanta Biswa Sarma-I Dhubri Lok Sabha constituency nung voting percentage atema tebilemetsü abenba lemsatepa liasü.

Iba constituency nung voting asüba ya taoksatsü ka lir aser Muslim nungeri kin dak rangloker vote asü ta CM Sarma-i ashi. "Nagaon aser Dhubri nung

Deputy Speaker Numal Momin aser Congress lennir aika lia Rakibul Hussain-i Speaker Biswajit Daimary ket nung resignation letter agütsü.

Iba constituency nung voting asüba ya taoksatsü ka lir aser Muslim nungeri kin dak rangloker vote asü ta CM Sarma-i ashi.

lendong aketba election results ajanga Assam nung loktiliba tamendakdak kanga tashi mait sayur. Rakibul Hussain-i votes lakh 10 temai takok angu. Iba ajanga kechi sayur? Iba ajanga asen loktiliba aser 'jatiya jibon' (national life) atema lendong sayur" ta Sarma-i osangbener dang ashi.

Congress Legislature Party (CLP)-ia Dhubri nungi MP

"Vote lakh 10 temai takok angu aser iba nung Hindu vote ka danga mali. Asen loktiliba atema lendong keta lir" ta paisa ashi.

Jiribam anasa Kuki telungpurtemi amshiba bunkers 4 raksatsü



Imphal, June 11, 2024 (Agencies): Imphal-Jiribam road nung Kuki telungpurtemi amshiba bunkers ta temulung meleme bilemba pezü raksatsüogo.

Sinam yimtsüng nung Manipur chief minister indang advance security team ka amakba sülen bunkers raksatsüogo.

meta telungpurtemi amakdang Manipur police ka aser civilian driver ka yiru.

Manipur police-i K Sinam yimtsüng nung bunkers raksatsü ta Manipur police control room-i metetdaksü.

Police aser sepaitemi counter-militancy operations inyakdang injangrep aika ngutetogo aser telungpurtemi amshiba hideouts/bunkers 4 raksatsü.

Iba tesemi Manipur police ketdangsürtem aser security forces tonga ao aser teyirurtem Imphal-i anir ao.

Kangpokpi district kübok K

June 10 anepdang 10:50 ako

Sepaitemi Sinam yimtsüng aser temeket nung bushisüngdang südar aser tensa süngjemtsü atema inyakdar.

# Ceasefire sentong Hamas dak keta lir: Antony Blinken



**Tel Aviv, Aami/June 11 (Agencies):** US aser UN nati bhukumba ceasefire sentong nung terenlok melira Hamas tenüng asentsü, ta US Secretary of State Antony Blinken-i ashi.

Anogo 11 jakdang US Tir Joe Biden-i sangdongba sentong Hamas-i agizüktsü atema Blinken-i nenshia ashi.

Iba telemtetba agitsü ya Gaza nung aliba storeys ter telung nung atsüka aliba nisung ka dak keta lir, ta pai Hamas lenir Yahya Sinwar athishia ashi.

Hombarnü Jerusalem nung jembishinüba mapang Israel Ato Kilonser Benjamin Netanyahu-i iba sentong nung shia aliba ama inyaksü maneni shiogo, ta Blinken-i ashi.

Biden-i agütsüba proposal bhukumba Netanyahu-i yimjak nung shia mali mesüra Biden sangdong amendakba Israel

proposal den apet asü masüar ajia mashi.

Biden-i sangdongba bhukumba Hombarnü UN Security Council nung pangzüng ka agizükba nung Hamas-i telangzüba tajung agütsütsü imlar, ta Blinken-i ashi.

Iba pangzüng nung Biden-i benokba proposal Israel-i agizükogo ta ashi aser Hamas dang kasaji inyaksü ayongzüka liasü.

Hamas-i Mongulbarnü sangdong ka agütsüba nung, iba pangzüng nung inoka aliba pela agizüker, ta ashi.

Ajisüaka Hamas telangzüba ya tatem masü ta Blinken-i ashi aser Gaza nung aliba Hamas lenirtemi kechi ashir aji züngshitsü aser ibaji tang tashi mali, ta ashi.

Iba proposal ya mapa kuma meinyaktetera ibaji par dak keta lir, ta pai ashi.

Alima dang mesangdongi

ita aika ceasefire atema jembia aruba sülen Biden-i taoba ita ceasefire alitsü aser pua alir ajunga chioktsü atema ibai Israel nunger tejangraba lir ta shia liasü.

Israel-i benokba proposal ya Biden-i benokba dang nungi taangba aser yimjak nung mesangdong aser US tiri benokba den balala asü masüar memetet.

Israel-i benokba yimjung sentong ya Israel indang nisung asem aliba war cabinet-i mulunga agizüka liasü aser sorkar nema memetetdaksü.

Far-right minister kari iba sentong anema nokdaker ta jangja-jangja shiogo. Tir Biden-i benokba sentong nung Netanyahu-ia bhukumba nokdaker asü masüar mashi.

Israel proposal ya Hamas nung mediator Qatar-i hopta tetenzüklen agütsüogo ta US-i shia liasü.

# Yemen anasa migrant rong ka tzüyim telungi alu, nisung 49 asü

**Cairo, Aami/June 11 (Agencies):** Horn of Africa nungi Yemen leni aoba rong ka nung refugees aser migrants tem mener tzüyim telungi aluba nung nisung 49 asü aser 140 samar bushir, ta United Nations indang International Organization for Migration (IOM) ajanga ashi.

Hombarnü mükepokba rong nungya nisung 260 shi mena liasü, aser timba Ethiopia aser Somalia nungi liasü aser parnok ya Somalia tzükumlen nungi kilometre 320 (mile 200) jaja Gulf of Aden ajanger Yemen atongtsü liasü.

Horn of Africa aser East Africa nungi refugee aser migran tem temulung tali ulushia Yemen ajanga Saudi Arabia aser danga Arab linüktem atongtsü meranger.

IOM ajanga Mongulbarnü sangdong ka nung nisung 71 kumzükgogo, aser par ti mozüki bushia bener ogo, ta ashi. Asürtem rongnung tanur trok aser tetsür 31 dena lir.

April ita rong ka Yemen atongtsü merangba mapang Djibouti tzükum anasa rong ana

raksar nisung 62 asü. Iba lenmang nung nisung 1,860 süogo mesüra samaogo, aser item rongnung nisung 480 arakseta asü, ta IOM ajanga ashir.

Houthi teloki linük yimtiba Sanaa densema Yemen nung tesem aika agiba sülen lendong timtem liaka refugee aser migrant temi iba lenmang nung jajar.

Israel-i Gaza Strip amakba sülena migrant tem aoba memelenshir.

Iran den sendaktepa aliba Houthis telok yagi ita aika Gulf of Adens nung commercial aser military rong tem maka Israel dang Gaza nung rara anentsü akhanger, aser külen United States aser United Kingdom-i tayimtsü amshia Yemen nung tesem balala amaker.

2021 nungi 2023 tsüngta migrant tem küm shia Yemen-i aruba ya asemsü agi timba akumer aser 2021 küm 27,000 arua aliba 2023 küm 90,000 arua liasü, ta taoba ita IOM-i ashi. Tang Yemen nung migrants 380,000 shi lir ta parnoki ashir.

# Tayimtsü tsükokba lendong nung Malawi tatongtir Saulos Chilima süogo



**Lilongwe, Aami/June 11 (Agencies):** Malawi tatongtir Saulos Chilima mena aliba tayimtsü koba tsükoka liasü, iba ya ngutetogo, ta tekümzükertemi metetdaksü, ajisüaka taküm alir ka danga mongutet, ta ashi.

Anogo ka tejakdang tsüngsang majungba ajanga military tatimtsü ya samatokba sülen Mongulbarnü linük anütoktiplen ngutetogo.

Tir Lazarus Chakwera-i ashiba agi, tayimtsü arem nung tsükokba sülen arishi küm 51 tain Chilima densema tayimtsü nung mena alir parnok 10 rongnung ka danga mekümzük.

Taoba first lady densema passenger tenet aser military crew züngsem asem tayimtsü nung mena liasü.

Iba tatimtsü ya linük yimtiba Lilongwe nungi Hombarnü apuso, saka minute 45 shi lir külen Mzuzu international airport nung manenteti liasü.

Tayimtsü raksar aliba

ngutetba sülen tir Chakwera-i, "ni temulung kanga koremer. Iba ya tesasatsü tatalokba ka ta sasasetta sangdonger. Tekümzükertemi tayimtsü ya tenem ka anasa ngutetogo. Parnoki tayimtsü ajar aliba ngutetogo aser nisung ka danga taküm maliasü," ta ashi.

2020 küm election nung taoba tir Peter Mutharika tokja Chakwera den adenba sülen Chilima ya tang agi term anabuba VP mapa bener liasü. Pa ya taruba küm tir election nung tokteptsüpurtem rongnung candidate ka asütsü ta bilema liasü.

Police aser armed forces atema supply contracts dak sendakba nung sübokrem agiba atema pa 2022 küm pua liasü.

Ajisüaka okdak kati iba ken o ya taoba ita agintsüogo. Chilima-i pa iba ken o nung aibelena mali ta shia aruogo. Critics temi ashiba agi, Chakwera-i ochimashi anema raratsü atema nangzüka süiki ia magir.

# South Korea nunger sepaitemi kümdangshitsü atema injang akha



**Seoul, Aami/June 11 (Agencies):** Iba hopta tetenzüklen North Korea nunger sepaitemi arrtsü adena aitba sülen South Korea nunger sepaitemi kümdangshitsü atema injang khaloktsüogo, ta South Korea indang military-i Mongulbarnü ashi.

North-i tawa jana bener balloon tem meyirejang aika South-i yokba sülen linük ana tsüngda tensa mejungi kümer lir.

North Korea nunger sepaitem kar arrtsü anütoktiplen mejangjaba mapa kar inyak aliba mapang Deobarnü mapang tatsüka military demarcation line adena ait, ta South Korea indang Joint Chiefs

of Staff-i ashi.

South Korea indang military-i kümdangshitsü atema injang khaloktsüba den osang agütsüba sülen North Korea nunger sepaitem idangjisa meyipa oadok, ta Joint Chiefs of Staff-i ashi. Kasa sangdong ajangasa North-i temulung malemstsüsa kecha jenjang magi, ta shisem.

North Korea nunger sepaitemi asaa arrtsü adena aitba masü asütsü ta South Korea military-i asatetogo, kechiyong arrtsü ya arem nung lir aser iba tesem nung MDL signs jangja jangja merprangteter, ta Joint Chiefs of Staff otongdar Lee Sung Joon-i osangbenertem dang ashi.

Korea linük ana tsüngda mine agi sünga aliba arrtsü ya alima nung prangbong hadir balala tesashitiba amenoker aliba arrtsü ka lir, kong anatsülen sepaitem meyirejang aika yoka lir.

Deobarnü South Korea-i, arrtsü nung loudspeakers amenoker anti-Pyongyang propaganda broadcasts tenzükshio. North-i tawa jana bener arrtsü adena South-i balloon tem yokba anema iba jenjang agi tenzükogo.

South Korea-i ashiba agi, North Korea-ia parnok indang arrtsü nung loudspeaker tem amenokogo, saka tang tashi melapoki lir.

# Kadete & Kire na BFI B-Level Referee kümogo



**Dimapur, Aami/June 11 (TYO):** Salew Kadete aser Seyievizo Kire na Nagaland nungi mezüngbuba BFI B-Level Referee kümogo, koba Chennai nung BFI Annual General Meeting agiba mapan sangdonga liasü.

Iba certificate anguba ya Nagaland nung basketball asayaba lokti asoshi alizüng tasen ka tongtetba lir. 2023 küm Puducherry nung 49buba Sub Junior National Basketball Championship asayaba mapang asadangba sülen iba certificate agütsüogo. Iba tatidang nung referee tem shisatsü, decision-making, physical condition, aser practical skill tema asadanger.

Salew Kadete-i pa basketball asaya aruba tepeyong lenisüba tajung aser teti kanga junga kasa dang asayaba sayuogo. Pa 2018 küm Chennai nung 68buba Senior Nationals asayaba mapang ajaki jangja aküm aser iba sülen 2022 küm Shillong

nung 71buba Senior Nationals asayaba mapanga pai kanga junga asayaogo. Maneni pa 2023 küm Ludhiana, Punjab nung 73buba Senior Nationals nung asayaogo.

Pai, 2022 küm Shillong nung Northeast Games asayaba mapang silver medal angu aser 2024 küm Nagaland nung Northeast Games asayaba mapang bronze medal nguogo. Pai B-Level Referee tatidang nung takok tajung anguba ya pai asaya kanga junga angatetba kuli lir.


Kasa mapang nung Seyievizo Kire-ia Nagaland aser state adena orr basketball asaya ajungketba nung teyari tulu agütsüogo. Pa 2019 küm mezüngbuba Bhavnagar, Ahmedabad nung Senior Nationals nung asaya aser 2022 küm Shillong aser 2023 küm Mizoram nung ta northeast zonal nationals nung Nagaland tenüng nungi asayaogo. Punjab, Ludhiana nung 2023 küm Senior Nationals asayaba

mapang Kire ya Nagaland Senior team vice-captain liasü aser 2024 küm Nagaland nung Northeast Games asayaba mapang pa lenisüba nung team asaya aser parnoki bronze medal angu.

Kadete aser Kire napronglai 2022 küm Shillong nung North East Games asayaba mapang silver medal nguogo. Asayamung balala nung shilem agiba ajanga tenati basketball asaya tajungba angateta aküm aser iba ajanga B-Level Panel Referees ama inyakba mapang teyari agütsütsü.

Iba takok tajung anguba atema Nagaland Basketball Association-i Salew Kadete aser Seyievizo Kire na nem tenüngsang agütsüogo. Iba takok ya Nagaland nung iba asaya tejakdangi aoba temaitsü ka lir, aser referee jenjang tajungba akümba sayur, koba ajanga asayar, coach aser fan tem ajak ajangzüksü, ta NBA Honorary Secretary, Sentiningsang Longkumer-i ashi.

# Midfielder Frenkie de Jong Euro nung masayatettsü



**Aami/June 11, 2024 (Agencies):** Netherlands nunger midfielder Frenkie de Jong, tetsüng teloktep yirur aliba mapang shitak nung taneptsü mongutetba sülen pa European Championship nung masayatettsüsa kümogo.

Ronald Koeman-i aniba team yagi tatembangbuba warmup asaya nung Iceland goal 4-0 agi akokba sülen, Dutch soccer association-i sangdong ka ajanga ashiba agi, Barcelona nungi asayar ya

Germany nung asayatsü aliba Euro 2024 nung masayatettsü. De Jong Hombarnü Rotterdam nung asayaba asaya ya bench nung mener repranga liasü.

"Pa taruba hopta asem tashi nung asayatsü atema temsüa makümtsü, anungji pa onok den ayutsü kecha nüngdak madoker," ta Koeman-i ashi.

Tetendangba ka agia De Jong tetsüng teloktep junga manepi aliba ngutetba sülen pa asayatsü timla aliba samaogo, ta Netherlands nunger

ketdangsürtemi sangdong ka ajanga metetdaksü,

Pa melena asayar shimtsü asoshi Koeman-i mapang tatsüka tsüngda nung telemtetba agitsü. Hombarnü De Jong melena AC Milan midfielder Tijjani Reijnders asayaogo.

Kasa mapang nung midfielder, Teun Koopmeiners, shiba Iceland den asayatsü atema warmup agiba mapang yirua liasü, pa-a iba asayamung nung shilem agitettsü magitettsü mejangjai kümogo. Koeman-i, parnok test result atadar, saka majungtsü ama bilemer, ta ashi.

Netherlands puri 1988 küm European champion koker lir aser parnok taküm Group D nung Poland, France aser Austria den ata lir.

Maneni Hombarnü Turkey goal 2-1 agi akokba asaya nung yiruba sülen Poland nunger striker Robert Lewandowski aser Karol Swiderski nata Euro 2024 nung asayatettsü masayatettsü mejangjai lir.

# BWF Rankings: Satwiksairaj & Chirag na tasembubai luogo

**Aami/June 11, 2024 (Agencies):** India nunger nungtugu badminton tebur tarep asayar Satwiksairaj Rankireddy aser Chirag Shetty na Mongolbarnü sayaba Badminton World Federation rankings nung tasembuba jenjangi asepzüka luogo. Tena taoba hopta Indonesia Open nung masayai liasü.

China nunger tarep Wei Keng aser Wang Chang na tebur tarep asaya nung temaba jenjangi tuogo aser tena sülen Denmark nunger tarep Kim Astrup aser Anders Skaarup na jenjang ana tejakdangi tua tang tanabuba nung lir.

Chirag aser Satwik nati May ita Thailand Open akokba sülen world No.1 tarep aküm, ajüsüka tena taoba ita Singapore Open nung mezüngbuba round nung tsüka liasü.

India nunger tarep yagi tang asaya aliba Australian Open nunga shilem magitsü atema telemtetba agia liasü.

Tebur jika asaya nung HS

Prannoy aser Lakshya Sen na maneni top-15 nung lir. Prannoy tang 10buba aser Sen 14buba nung lir.

Kasa mapang nung Kidambi Srikanth-bo jenjang pezü asepzüka lua tang 32buba nung lir aser India nunger tebur asayartem rongnungi Priyanshu Rajawat o Kiran George na 34 aser 35buba nung lir.


Tetsür kija asaya nung Olympics nung medal ana tashi ngur alila PV Sindhu maneni 10buba nung lir.

Tetsür tarep asaya nung Paris Olympics nung asayatsü aliba tarep Tanisha Crasto aser Ashwini Ponnappa na jenjang ka tejakdangi tua tang 19buba nung lir.

Treesa Jolly aser Gayatri Gopichand nata jenjang ka tejakdangi tua tang 24buba nung lir.

Commonwealth Games nung bronze medal ngur aliba tarep ya Indonesia Open nung round of 16 nung tsüka liasü.

# Chennaiyin FC-i Wilmar Jordan Gil alizükogo



**Aami/June 11, 2024 (Agencies):** 2024-25 season metenzük tsüngda Chennaiyin FC-i, Colombia nunger striker Wilmar Jordan Gil den tenangzüktepba yangluba Indian Super League club yagi Mongolbarnü sangdong ka ajanga metetdaksüogo.

Colombia nunger striker ya asayar tejen aser tasa tajung beshia asayaba asayar ka lir aser pa ISL nung season ana tashi asayaogo.

Wilmar, ISL nung mezüng 2022 küm NorthEast United FC nungi asaya. Iba sülen pai ISL debutants Punjab FC nungia kanga takok ngua asayaogo, kong pai asaya 15 nung goal ti idakja liasü.

Pa Chennaiyin nung küm ka atema denogo aser pa densema 2024-25 season atema club-i asayar pongububa anisemogo. Elsinho Dias aser Chima Chukwu na sülen pa ya bendanger asayar tasembuba kümogo. Club-i taoba mapang captain Ryan Edwards den tenangzüktepba yanglushiba sangdongogo.

"Wilmar kanga junga asaya arudar aser pai pa aolen ajak nung goal idaktsür. NorthEast

asur Punjab na nungi asayaba mapang asaya 33 nung goal 24 idaktsüba ya striker ka atema ratio kanga tajung lir. Pa anisemba atema onok kanga pelar," ta coach Owen Coyle-i ashi.

Wilmar-i, domestic league tem aser international asayamungtem nung kanga takok ngua asayaa arudar. Pa senior career ya Venezuela nung Monagas nungi tenzük, kong pa 35ben asaya aser goal 20 idakja pa goal timtiba idaktsüba asayar liasü.

"Iba club nung densemba atema aser kü nem iba maongka agütsüba atema kanga pelar. Ajemalua meranga inyakba den bendanga agütsüba ajanga nükkjidong yua alibattem tongteta title abentsü," ta Wilmar-i ashi.

2011 küm pa South Korea nung Gyeongnam FC nung aden aser iba sülen 2013 küm Bulgarian club Litex Lovech nung dena liasü. Iba club nunga pa goal timtiba (20) idaktsüba asayar liasü.

Maneni pa Chinese Super League club Tianjin Teda, U.A.E. club Emirates Club, Portuguese club Chaves, aser Colombian club Atletico Huila nunger nungia asayaogo.

**BILEMDANGANG**  
"Nü tebilemdangba agi masü saka nü tatishitsü agi temelenshi adoker."